

台州文獻叢書

喻長霖等 編纂

胡正武 徐三見 李建軍 樓波 點校

台州府志

點校本

五

卷四四至五九

上海古籍出版社

圖書在版編目(CIP)數據

台州府志(點校本)/喻長霖等編纂. —上海:上海古籍出版社, 2015. 10

(台州文獻叢書)

ISBN 978-7-5325-7677-7

I. ①台… II. ①喻… III. ①台州市—地方志 IV. ①K295.53

中國版本圖書館 CIP 數據核字(2015)第 130493 號

ISBN 978-7-5325-7677-7



台州文獻叢書

台州府志(點校本)

(全十冊)

喻長霖等 編纂

胡正武 徐三見 李建軍 樓波 點校

上海世紀出版股份有限公司
上海古籍出版社 出版

(上海瑞金二路 272 號 郵政編碼 200020)

(1) 網址: www.guji.com.cn

(2) E-mail: guji1@guji.com.cn

(3) 易文網網址: www.ewen.co

上海世紀出版股份有限公司發行中心發行經銷

江陰金馬印刷有限公司印刷

開本 710 × 1000 1/16 印張 370.25 插頁 57 字數 4,800,000

2015 年 10 月第 1 版 2015 年 10 月第 1 次印刷

ISBN 978-7-5325-7677-7

K · 2054 定價: 1980.00 元

如有質量問題,讀者可向工廠調換

台州府志總目

第一冊

台州文獻叢書序·····一

點校說明·····一

續修台州府志序·····一

卷首

台州府圖

臨海 黃巖 天台 仙居 寧海 太平

縣圖

姓氏

例言

續例言·····一

卷一

弁言一卷·····一三

卷二

晷度表一卷·····三〇

卷三

沿革表一卷·····七七

卷四

戶口表一卷·····一三二

卷五

土田表一卷·····一五八

卷六之八

賦稅表三卷·····二一六

卷九之卷十

職官表二卷·····三二二

第二册

卷十一之二十

職官表十卷……………四七九

第三册

卷二十一之三十

選舉表十卷……………一〇九七

第四册

卷三十一之三十三

恩澤表三卷……………一六九五

卷三十四之三十六

人物表三卷……………一七七九

卷三十七之三十八

列女表二卷……………一八四二

卷三十九

疆域略一卷……………一九三三

卷四十之四十三

山水略四卷……………一九七一

第五册

卷四十四之四十七

山水略四卷……………二一六三

卷四十八之四十九

水利略二卷……………二三三一

卷五十之五十三

建置略四卷……………二三八三

卷五十四之五十五

祠祀略二卷……………二五二九

卷五十六之五十七 學校略二卷……………二五八七
卷五十八之五十九 武備略二卷……………二六五五

第六册

卷六十之六十一 風俗略二卷……………二七一九
卷六十二之六十三 物產略二卷……………二七三一
卷六十四之七十五 藝文略十二卷……………二八四二

第七册

卷七十六之八十四 藝文略九卷……………三三六一
卷八十五之九十 金石考六卷……………三七七五

第八册

卷九十一之九十三 金石考三卷……………三九四一
卷九十四之九十五 古蹟略二卷……………四〇七二
卷九十六之九十八 名宦錄三卷……………四二〇七
卷九十九 寓賢錄一卷……………四三六一
卷百之百零四 人物傳五卷……………四四二八

第九冊

卷百零五之百二十四 人物傳二十卷……………四五九九

第十冊

卷百二十五 人物傳一卷……………五二五七

卷百二十六之百三十一 列女傳六卷……………五二九六

卷百三十二之百三十六 大事記五卷……………五五四五

卷百三十七之百三十八 雜事記二卷……………五七六四

卷百三十九之百四十 方外記二卷……………五八三四

續修台州府志跋……………五八九〇

《民國台州府志》整理後記……………五八九二

台州府志卷四十四

山水略五 天台縣山

縣山自孫興公作賦，膾炙人口已千數百年，奇山異峰難更僕數。《嘉定赤城志》所紀山止二十有餘，嶺止二十，其餘峰巖洞石更屬寥寥。康熙時修府縣志，所紀較詳，近《褚氏新志稿》兼取《范氏志要》、《方外志要》、《天台山志》、朱國華稿，并《浙江全省輿地圖》，即《浙江水陸道里記》五里方圖，後省稱《記圖》。增入一二，始稍加詳，茲綜裒諸稿，詳加訂正，著於篇。

（總綱）縣山大幹發脈於金華府東陽縣大小盆山，前志謂大盆山東支發爲天台山，不及小盆，今案《記圖》，始豐溪北爲大盆東支脈，始豐溪南爲小盆東行脈，蓋始豐溪發源於大盆山南麓，在東陽境內已界大小盆，分爲兩大幹。以始豐溪爲界，溪北之山皆大盆山東峰發脈。其正支東北行度關嶺，起爲華頂山，自關嶺溪一直界至清溪而止，皆華頂四正四隅之支山。本《褚稿》敘鷓鴣山脈系下注文。關嶺以西之山，自大盆東支分而東行起鷓鴣山，一直東南行盡於始豐山，西南行盡於柴嶺，始豐溪自東陽縣來，即於此嶺入境。是爲溪北兩大幹。南幹自小盆嶺東行，案《記圖》，自大盆嶺下渡大盆橋（在始豐溪上）至小盆嶺，東行三四里許爲小盤山。又案《記圖》，於始豐溪南雲霧山北圖一山，題曰大盆山東峰。此誤於前志「大盆東支發爲天台山」一語，考東陽縣圖，已以始豐溪劃

分大盆東峰於溪北，小盆等山於溪南，且據東陽、永康二縣圖，大盆與小盆不但有始豐溪斷其脈系，更有永康之龍潭口橋之水發於大盆嶺東，又界斷大小盆，故雲霧一山實自小盆。東行二十里，山山相連，而至去大盆東峰實遠，而天台圖竟圖大盆東峰於雲霧山北，殊誤。由東陽、永康、天台三縣共界之雲霧山入境，蜿蜒東南行，蟠結爲大雷山。《方外志要》：「山高與華頂頡頏，半隱雲霧，躋絕頂則東眺郡城至海門，南矚仙居及括蒼，西望東陽、永康，北觀天台及新昌剡上。」又《褚稿》謂南境之山，似不與華頂接脈，然迴遶盤旋，恰與華頂相對，若孫曾之繞祖父。然則此山爲溪南主山也。溪南之山皆自此分支。

（綱）自華頂山南行，起天柱峰，爲天封、東岬諸山所發脈，又自東岬山西南行，過東岬嶺，陡起爲東橫山。自華頂山北行，起香柏峰，爲慈聖、萬年諸山所發脈。自華頂山西行，起葛閭峰，爲五峰、桐柏諸山所發脈。又自五峰西行，起赤城山，自桐柏西北行，起雙闕、瓊臺二山。自華頂山東行，陡起爲蒼山，其附近諸山皆自此發脈。以上爲華頂四正發脈之幹山。自華頂山西南行，起大雷峰，爲佛隴、高明諸山所發脈。又自佛隴分支西行，盡白鶴山。又自白鶴山南行，經北隴入治城，起妙山，爲治城內諸山所發脈。自華頂山西北行，起香爐峰，爲桃源、石橋諸山所發脈。自華頂山東北行，起菩提峰，爲大同諸山所發脈。自華頂山東南行，接寧海縣境，爲王愛山，《褚稿》於王愛山一幹本作華頂東北行，接寧海境。今案《記圖》，自華頂經摘星峰，入寧海境，固自華頂東北行，若自華頂經麒麟山、筋竹嶺至王愛山入寧海境，則自華頂東而少南，非東北行也。爲其附近諸山所發脈。以上爲華頂四隅分支之幹山，此是始豐溪北一大幹。自大盆東支東北行，由梅枝嶺入境。本《記圖》。又東北行，起鷓鴣山，西分爲千佛諸山，東南分盡於始豐山，自峇舊府志作「峇」山西行，起方山，爲其附近諸山所發脈。以上爲大盆

東行支山，亦爲始豐溪北一大幹，略本《褚稿》。溪南大幹自大雷山東北行，爲寒巖、明巖二山，又東北爲瀑布山。《記圖》此作紫凝山，在寒、明二巖山東北，茲從《記圖》。自瀑布山東南行，踰茅狗洞溪而東至茅園塔山，此即大科山，詳後專條。溪南大幹盡於此。

（目）自天柱峰發脈之天封山分支，案《褚稿》，天封山之下另列靈墟山，即天封別名，詳後專條。則智者嶺、瑞雲峰、盤陀石在焉，南行至東岫山，則搖鈴巖、顧仔嶺在焉。均詳後專條。東南行爲魏嶺，西南行爲釣艇山，則石筍巖在焉。自釣艇山循螺溪南行，爲螺溪尖，以上方位並本《記圖》。又有觀音巖，其附近又有蔓蘿山、箕富山、九折峰。自東橫山分支東行，其山爲耳山嶺，爲東橫嶺。案《記圖》，自歡輿西行，度黃泥嶺，又西爲東橫嶺，又西即東橫山東麓。其南有犀牛翫月巖，南盡處有新娘巖，南下有石鴨，此石據舊縣志補，方位本《記圖》。其西有絹機巖，北有鷄籠石。其支山又有鳳凰山。自香柏峰發脈之萬年山分支，案《褚稿》，敘天台主山於香柏峰下云：「爲慈聖、萬年諸山所發脈。」則慈聖亦當爲支山中之幹山，與萬年山等，然其下敘香柏峰脈系，則止有萬年山，而無慈聖山，即舊府縣志亦止有萬年山，然其寺觀門載有慈聖寺。《記圖》於烏溪東岸亦載有慈聖寺，惟府志於慈聖寺云「一名聖跡」，則聖蹟山即慈聖山也。然據《褚稿》，聖蹟山入石橋山脈系，則宜隸香爐峰，不宜入香柏峰下矣。爲八峰山，其附近有通元峰、水壇西峰、盤來嶺。自山西北行有藤公嶺、會墅嶺，此嶺補敘，詳下專條。又有神仙趕石。東南行有羅漢嶺。自葛閭峰發脈分二支。東南行爲左支，起國清五峰山。西南行爲右支，起桐柏山。五峰山之中，拾得巖在焉。五峰山西分少北爲大鼇山，南分少西爲西塘山，南分少東爲上黃山。方向本《記圖》。自大鼇山西南行，起赤城山，上有釋籤巖、結集巖、穿劍巖、虎頭巖、烏石洞、玉京洞、紫雲洞、餐霞洞。二洞今補。山東北有赤幟峰，西南爲金墩山，曹

家巖在焉。葛閭峰左支盡於此。桐柏山之上，有隱身巖、劍巖、印巖、劍、印二巖，據《褚稿》補。大小石鎖巖、金庭洞、丹霞小洞。自桐柏山東北行爲洞天嶺，西南行爲桐柏嶺，嶺方向本《記圖》。西行爲瀑布山，據《徐霞客游記》補。西南爲九峰山，又西南爲司馬悔山，南行爲方瀛山，本《記圖》。雲蓋峰在焉。自桐柏山西行少南爲雙闕山，又西少南爲瓊臺山，仙人石在其上，金爐峰在其南，蓮華峰在其西，本《志要》。白水嶺在其西少北。本《記圖》。又有百丈巖，與瓊臺山相望，皆葛閭峰右支脈系也。自蒼山分支偏東爲牛游山、覆盆山、寶華山，偏南爲繫船山，獅子巖在其北。又有接石山、髻山、招吳山、松山、亭山、山隍嶺。嶺東爲黃振嶺，其東北爲興化嶺，又東爲招隱嶺，偏南稍西有五百羅漢石。石方位本《記圖》。此外又有玉女峰。自大雷峰起，脈分二支。左支起佛隴諸山，右支盡飛鶴山。自佛隴山分支東北行爲白雲峰，峰南有巾子巖，東南行爲高明山，前志皆不錄此山，據《褚稿》佛隴山下注云「中有大慈寺」，《記圖》載高明寺在大慈寺東南。西南行爲銀地嶺，又西南爲金地嶺。幽溪之旁有幽溪嶺，嶺上有靈響巖、香谷巖、圓通洞、般若臺石，又定光庵之東有招手石。自飛鶴山南行爲楊家山，東北行爲尖山，北行爲西籠山、水木峰，又北行爲傳教山。飛鶴山之陰有隱巖、蜈蚣巖。山之西有鑿字巖，山東北有四果洞山，足有神蹟石。自飛鶴山南行人城爲妙山，西分爲坡山。妙山之南有大嶺，東有小嶺，北有佑聖嶺，西爲朱何嶺，西麓有紡車巖，坡山南麓有坡街巖。按《褚稿》以此巖北幹之後，茲編就幹分支，故既敘飛鶴山，即隨飛鶴山脈系而及之。自香爐峰分支西行少北爲桃源山，山之中峰爲合翠，東峰爲雙女，西峰爲迎陽。山之北有白郎巖，山之半有劉阮洞，洞南有會仙石。桃溪之上有三茅岡。自香爐峰分支西北行爲石橋山，又西北爲羅公嶺，又西北爲八桂嶺，其東北爲箬

嶺，西北分爲斷橋山，又西北爲聖蹟山。石橋之側有巖曰捨身巖，洞曰蓋竹洞。山北有蒸餅峰。自菩提峰東北行起大同山，坐視巖在焉。東北行爲摘星嶺，嶺南有摘星南峰，峰南有齊明岡，岡南又有疊石岡，峰邊嶺路曰麻狸搖嶺。嶺北有摘星北峰，峰北又有望海岡。自菩提峰東南行至王愛山，西爲麒麟山，南爲筋竹嶺，徐鎮辨譌：「天台筋竹嶺，諸本或作『筋竹』，非。《嶺表錄》云南海岸邊沙中出沙筋，一名越王竹，《北戶錄》嚴州產越王竹，土人用爲酒籌。地志衢州有筋竹山，又《天台圖經》筋竹出台州，五縣皆有。《玉篇》：『筋』俗作『筋』。《竹譜》，筋竹，竹之多筋者。夫衢、嚴在台之西，公游台山自寧海、奉化來，在台之東，去衢、嚴八百餘里，則台州之筋竹無疑。或作『金』，非。」嶺東爲茭湖嶺。華頂四正四隅之支山，略盡於此。此爲始豐溪北一大幹。自梅枝嶺東北行，起鷓鴣山。《褚稿》以此幹聯敘於桃源山之西。西行爲千佛山、聚青山、石壁嶺、仙疊石，偏南有鳳山、金簍嶺、儒堂山、土牆山、甌山，東北有關嶺，方位本《記圖》。西北有王會嶺，嶺據志補，方位本《記圖》。此外附近又有筋竹嶺，此與上筋竹嶺名同實異。烏巖嶺、牛路嶺、斜嶺、佛巖。自鷓鴣山東南行至始豐山，其北麓有伏虎嶺，東北阜有如來洞，其附近有鼻山、折山。鼻山南麓有獅子巖，此外又有拋陀石。自峇山西南行，起方山，又西南爲麒麟山，與上麒麟山異地同名。西行爲雷馬山、象山、焦山、澹山、淨慧山，據敘水及《記圖》補。蘆峰。東行爲白衣山，北行爲西青山、大旗山、菡山，上有菡溪峰。據舊府縣志補。此外附近有嶠嶺、王顧嶺、鎗旗嶺，此爲始豐溪北又一大幹，所謂大盆東支是也。《褚稿》云「鷓鴣、始豐、方山之屬，俱不由華頂分支」，蓋天台山發脈於大盆山，入境後其正支西北行、度關嶺、起華頂山，自關嶺溪一直界至清溪而止，以北爲華頂支山，以南皆大盆支山也。褚於始豐溪北分此兩大幹。

溪南自大雷山起脈，其側有小雷山，偏北有措笏山，又北有獨山，偏西爲月嶺。嶺東北有搖

靈巖，又東北有千丈巖，巖西北爲天柱山。山南有潢水峰，又西爲五羅山。山西北有鶴頂峰，峰東北爲青凝峰，山西有朝陽峰，又西有蟠松峰，峰西南爲營盤山，西北爲疊石嶺。峰西爲周家嶺，其南爲上盧嶺，據《記圖》補。其西爲雲霧山，與東陽、永康二縣界。此外界仙居者，山有紫籐山，巖爲雙峰巖，岡有雁門岡。以上方位均本《記圖》。其附近又有蒲棚嶺，自大雷山東北行爲寒巖山，旁有隱身巖，腹有潛真洞，洞前有宴坐石，石西有鵲橋。其前有道人洞，此橋即巖也，與石梁等。《赤城志》石梁列石類，故此鵲橋亦列石類，此橋與洞均本志注文補。轉西又有龍鬚洞。山東北爲孟湖嶺，西北爲明巖山。山前有幽石，石下有棲真洞。自洞轉北有合掌巖、重巖，據志注文補。此外洞有勝福洞、朝陽洞，巖有石柱巖、響巖。下茅園塔山脈系，亦有響巖，與此同名異實。南出十里，又有老人巖。瀑布山西南爲茶山，據舊府縣志。南少東爲石盤龍山，又南爲踞虎嶺，又南有仙掌巖。踰茅狗洞溪而東爲四靜山，其南爲摩空嶺，又南爲天平山，山西南爲鞍頭嶺。四靜山之東爲翠屏山，山北有翠屏巖，巖東北有巧尖峰，又東爲璪峰，《褚稿》敘山系作「爐峰」，其下專條作「璪峰」。今案舊縣志作「璪峰」，舊府志則作「爐峰」，皆以形似致誤。又東爲石倉山。《褚稿》此山隸大科山脈系。案大科山即茅園塔山，在翠屏溪南，此山據《記圖》應移此，詳後專條。山東爲赤巖，此外又有浙嶢峰、紫凝峰、瑞龍峰，《褚稿》敘山系無此二峰。靈巖、開巖、鷹嘴巖。茅園塔山偏西有白石尖，又西爲銀山，其頂有玉筍峰，銀山西南爲山隍嶺。據舊縣志補，其方向本《記圖》。嶺西有奇石巖，嶺西北有觀音巖，又有狐狸徠嶺。此嶺與巖均本《記圖》。嶺南爲瑞屏山，山東南爲黃檀嶺，舊府志作南檀嶺。偏南有大小澹二山。小澹山西南爲望海尖，東南爲杜潭嶺。此嶺西南又有杜潭嶺，在杜潭嶺南，亦近臨海界。偏北爲龜山，又北爲鯉山。《褚稿》於鯉山下，列有石倉山，茲編案溪界移入瀑布

山脈系，詳見上。偏東爲响《褚稿》作「響」，茲本《記圖》。巖山，前志此列巖內，茲本《記圖》作「山」。其南爲石塘嶺，東南爲黃山嶺，又東南爲大覺山，綴石在其側。大覺山西南爲灘嶺，以上方位，《褚稿》爲本，參以《記圖》。此外巖有龜巖、繫船巖、麻姑巖、會仙巖。以上皆隸茅園塔山。西界翠屏坑水，東南界始豐溪而止。始豐溪之南支山略盡於此，始豐溪水亦於此，自杜潭嶺出縣境。

案始豐溪南之山，見於志乘，最稱名勝者，寒、明二巖山及瀑布山，其餘層巒疊嶂，志所未載，見於《記圖》者尚多，如寒巖山南有奇巖山，茶坑南有小方巖山、紫凝山（即上文瀑布山），東南有石大人山，又有崔家山、四靜山，北有晒網尖，又北有大巖洞、摩空嶺，南有白象山，又南有羅漢山。

華頂山，《赤城志》此入峰類，無「山」字。在縣東北六十里。歡溪發源於此，台山第八重最高處。《赤城志》謂舊傳高一萬丈，然陶弘景《真誥》謂一萬八千丈。少晴多晦，夏猶積雪。絕頂有降魔塔，爲智者大師降魔處。智顗與白雲先生思修於此，上有葛玄丹井（詳見井類）、王羲之墨池、李白讀書堂（詳見山志古蹟）。其峰嵐重疊如千葉蓮花，此山爲華心之頂，故名。西有黃經洞，王右軍爲白雲先生書《黃庭經》云藏於此，《記圖》作「黃金洞」，非。

天柱峰，在華頂山南。宋永明壽禪師習靜著《宗鏡錄》處，《褚稿》不載道里。

香柏 舊府志本《赤城志》作柏香，茲本舊縣志及《褚稿》。峰，在華頂山北，《褚稿》不載道里，舊府縣志本《赤城志》，皆云「縣北六十里」。山多柏木，故名。舊府縣志本《赤城志》。

葛閭峰，在華頂山西。前志皆不載此峰，《褚稿》本《方外志要》謂「當寒風闕之上，即長壽寺照山」，今案寒風闕在縣北三十里。大雷 舊府志本《赤城志》作「雷」。峰，在華頂山西南。《赤城志》謂縣北二十九里爲大慈寺主山，有蜜蜂洞在其東，《方外志要》謂峰後有聖蹟石，一大石橫案二小石上，如僧以包袱壓雙履然。

香爐峰，在華頂山西北。《赤城志》、舊府志皆不載此峰，《康熙縣志》縣東北五十里十一都，以日出有紫烟，故名。

菩提峰，在華頂山東北。《赤城志》、舊縣志皆不載此峰，舊府志，峰在縣北八十里。

以上皆始豐溪北幹山。

大隱峰。《赤城志》不載此峰，舊府縣志謂未詳處所，宋錢厚之建雙清堂於其下，王銍爲記，姑附此。

柏樹嶺，在華頂東、縣北四十里。前志不載此嶺。

察嶺，在縣北三十里。《赤城志》「縣西二十里」，府舊志入古蹟，舊縣志「縣北五十里」，茲本《褚稿》。按舊志謂漢高察隱處，故名。

望海石，一名望海尖。天台最高處。《徐霞客游記》「自天封寺至華頂三里，乘月獨上，誤登東峰望海尖，西轉始得路至華頂」，是望海尖，華頂之東峰也。

寒風闕，在縣北三十里。《褚稿》謂「取華頂直道，兩崖如闕，巨石距其表，罡風蓬蓬，即六月亦披裘而慄，有大小二寒風闕，相去不遠」。《遊記》謂「自龍王堂南十里東闕」，又云「有仙人鞋在寒風闕左，可逾嶺而止」。潘耒有《大小寒風闕》詩。

分水嶺，在縣北四十里華頂之南、察嶺東北。案《徐霞客遊記》《後省稱《遊記》》，分水嶺之水西流爲石梁，東流過天封遶摘星嶺而東，出松門嶺，由寧海注海，則此嶺爲石梁、天封二水劃分之處。《褚稿》「察嶺在縣北三十里」，《遊記》謂「自分水嶺南十里爲察嶺」。

以上皆主山附近峰嶺，以下爲天柱峰發脈，起天封山。

天封山，在縣東北五十里。此道里見《方外志要》。案《陸道記》，自大東門至天封寺三十九里一分，援四捨例三十九里，言成數爲四十里。以天封寺得名。直北登巖十里即華頂也，由檣溪歡谷攀華頂者必於寺憩息

焉。天封寺旁有卓錫泉。

智者嶺，在縣東北天封山，爲智顗振錫處。

瑞雲峰，在天封山。邑西北桐柏觀前亦有瑞雲峰，同名實異山。

盤陀石，縣東北五十里天封寺。

東岬山，一名歡塢山，在縣東十五里。齊侍郎召南有《歡山煙雨》詩，即詠此山也。

顧儒嶺，縣東十五里。見《赤城志》，謂「案《輿地志》，舊名東岬，有齊處士顧歡讀書堂，後人因以爲名。今嶺旁有歡溪、歡塢，且有顧姓居之，或其苗裔也」。《輿地志》謂舊名東岬，至歡讀書以後，山則仍東岬舊名，嶺則稱顧儒嶺。

搖鈴巖，在東岬山上。《台山志略》云：「西壩有平阜盛一圓巖，周圍約百餘步，以一指搖之即動而有聲。」

魏嶺，縣東北三十三里。舊府縣志道里謂在天封之外，舊產茶。

蔓蘿山，縣東北三十里。本舊府縣志。

九折峰，縣東北三十里。前志皆同，謂智顗宴坐立道場處。

釣艇山，縣東北二十五里，螺溪發源於此。

石筍巖，在釣艇山。《徐霞客遊記》云「循溪東下抵螺溪，溯溪北上，兩崖峭石夾立，樹巔飛瀑紛紛，踐石躡流七里，山迴溪墜，已至石筍峰底」，然則徐氏固以此巖爲峰矣。案十景有螺溪釣艇，即此。

螺溪峰，《徐記》作螺溪尖。縣東北十五里。峰尖如筆，其分支遞下，皆作人形，與西北之赤城峰、西南之巧峰、東南之大科峰，四峰相望，爲一邑之文峰。

箕畚山，縣東十五里。《赤城志》、舊府志皆不載，茲據舊縣志。

觀音巖，在螺溪側。舊府志：「冠綏纓珞於蒼翠中，宛然一觀音大士。」

以上皆隸天封山，東界歡溪，西界螺溪而止。以下起東橫山。

東橫山，《赤城志》作「覆船山」，《方外志要》作「石井山」，《萬曆縣志》作「丹邱山」，俗呼黃榜山，山側有古淨池，今蕪沒。縣東十里，以橫互縣東，故名。《神邕圖經》以此山爲台山脚，其上坦夷可三十頃，中有三泉，冬溫夏冽。舊志：「明嘉靖戊午縣令鍾組建丹邱臺於其上，萬曆九年令毛鶴騰重建。」

耳山，在東橫山東。

犀牛翫月巖，在東橫山南。舊府志云「在丹邱山南」，舊縣志不列此巖。

新婦巖，在東橫山南盡處。舊縣志有石望如婦人，舊稱爲新婦巖，長身端坐。

石鴨，在東橫山南下。范理《志要》「每溪流逼向此山下，則有顯宦」。又據《記圖》，東橫山南麓、東橫大村之西，有鴨子殿，亦由此石鴨而名。

絹機巖，在東橫山西。《山志》云「在丹邱山西首」，舊府志本此，舊縣志不列此巖。

鷄籠石，縣東南八里。案《記圖》，自石東行爲犁壁山，又東爲獅狂巖，其東南至岳山而盡。

鳳凰山，縣東十里。舊府志本《赤城志》，謂即孫綽賦所謂「觀翔鸞之濟濟，聽鳴鳳之嚶嚶」，即此地也。《褚稿》以爲附會，本《志要》云「山形如鳳者三」，故其地亦名鳳林崖，上有仙人掌，跡甚鉅，南有釣魚臺，及呂洞賓所游之地，名呂道岸，其地夏日蚊蠅不入，所產芝草，入藥更佳」。

以上隸東橫山，亦東界檣溪，西界螺溪，惟南則至始豐溪而盡。自天柱峰發脈諸山、嶺、峰、巖盡此，以下起萬年山。